



16. april 2019

UPA 2019/136

Naqqiut

Siunnersuut imm.136. 11. februar 2019-meersoq taarserpaa
(Siunnersuuteqartup atia allanngorpoq)

Inatsisartut suleriasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Nunatsinni saviminikorpasuit eqqakkat iginneqassanngippata qanoq iliornikkut atorluarneqarsinnaaneri pillugu apeqquteqaat aallaavigalugu oqallisissiaq.

(Inatsisartuni ilaasortaq Siverth K. Heilmann, Atassut)

Sineriak tamakkerlugu saviminikorpasuit eqqakkat sumi tamaaniilersimasut takussunaqisullu peerneqartariaqaraluarput. Kommunitinilu suliasaammata ilaatigut aningaasatigut tullerriaarinerni akissaqarfigneqarneq ajorlutik. Tassaasinnaappullu angallatikorpasuit, sanaartornerni atorneqarsimasut, allallu saviminikut.

Uanilu eqqaanissaq eqqartorsinnaagaluarparput, qanorlu piiarsinnaanerlutigit. Inatsisartuniluunniit isumaqatigiissinnaanersugut piunassuseqarnerisugullu ataasiartumik annertuumillu saliisoqarnissaanik aningaasaliissinnaanissaq pillugu. Periarfissalli allat aamma ammaffigisariaqarpagut. Oqariartaaseq “allap eqqagai, allap guld-iutigai” immaqa uani atorsinnaagaluortoq, aalajangerluta taakku saviminikorpasuit arlaatigut atorluariasarniarlugit.

Paasinarneqarsinnaagaluarpoq sumiiffinni aalajangersimasuni saviminikunik aatsitsiviliortoqassappat qanoq akeqarsinnaanersoq, qanorlu ilioraanni akilersinnaasumik ingerlanneqarsinnaanersoq avammut tunisassiassanngortikkaanni. Immaqa iluanaarutaarujussuarnissaanik naatsorsuuteqanngikkaluarluta aatsitsivimmik sanasoqarpat, aatsitsivillu ingerlaalerpat, sanaartorneq, sulisoqarnerlu ataavortoq ingerlaalerpat suliffissaqartitsinikkut iluaqutigisinnaavarput.

Minnerunngitsumillu saviminikorpasuit sumi tamaaniittut piiarneqaleriapata illoqarfippat kusatsissaaq, tikeraanullu isigiuminarnerulerluni. Pinngortitarpullu pingaartillugu oqartuutarutta piffissanngorpoq tigussaasumik iliuuseqarnissatsinnut.